

TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

"E ite outou e, te mau parau a te Atua ta'na i parau i te mau përopheta mo'a ra, e faatupuhia ia; eiaha outou e parau e, te faaroaroa ra te Fatu i te mahana o to'na taeraa mai i te tamariia Iseraela ra." *Buka a Moromona; III Nephi 29:2.*

Nu. 4.

10 Tenuare, 1912.

Mat. 5.

Te Taeraa Piti Mai o te Mesia ra.

(TUATIRAA.)

I TE avae ra Ditema, ua haapapuhia te parau e, e tae faahou mai te Tamaiti a te Taata mai te hanahana rahi, e ia tae mai Oia, e faautuahia'i te taata atoa mai te au i ta ratou ohipa, i ravehia a ora'i ratou i te ao nei ra.

Ua itea anei te mahana e te hora e tae mai ai te Mesia ra? Eiaha roa'tu; aore roa te hoê taata i ite i te mahana, e aore atoa te mau melahi i ite, e aore atoa hoi te Tamaiti i ite i te mahana e te hora e ho'i mai ai Oia ra.

"Area te reira mahana e te reira hora, e ore roa te hoê e ite; e ore hoi te mau melahi o te ra'i, e ore atoa te Tamaiti, maori râ o te Metua ana'e ra. E haapao maitai, e faaitoito, e e pure, aita hoi outou i ite i taua tau ra." Mareko 13: 32-33.

Ua faaauhia hoi To'na taeraa mai i ta te taata eiâ ra; ahiri i itea ia tatou te hora e tae mai te eiâ ra, ua riro ia tatou i te ara maite, ia ore roa to tatou ohipa ia eiâhia. Te ite nei hoi tatou e, no roto mai i te mau papairaa mo'a te reira ite, e riro ia tatou i te rave te mau ohipa mai ta tatou

i matarohia ra, oia hoi, e amu ra tatou e e inu hoi, e e faaipoipo te taata, e e horoa ia faaipoipo ia tae mai Oia ra, e riro ia te tahi pae i te taata i te raveraa ohipa i to ratou mau faaapu. Tera mai te auraa mau no te mau parau i papaihia na, oia hoi, e vai noa te pae rahi no te mau taata ma te ineine ore roa i te farereiraa i to ratou Faaora. E no reira ua tia mau te faaararaa ra, o tei na ô mai nei e:

“E teie nei, ia parahi ineine noa outou; ei te hora mana‘o-ore-hia e outou na e tae mai ai te Tamaiti a te taata nei.” Mataio 24: 44.

Ua faaite atea te parau a te Atua e rave rahi te mau mea e tupu hou te Mesia e tae faahou mai ai. Nate Mesia iho i faaite atu i te tahi mau parau maramarama i ta’na mau pîpî, i uihia’i Oia e ratou i te tapao no To’na taeraa mai e te tapao atoa hoi no te hopea o teie nei ao.

“Ua parau atura Iesu ia ratou, na ô atura, E ara ia outou ia ore roa outou ia vare i te taata. 5 E rave rahi hoi te haere mai ma to’u nei i’oa, e te na ôraa mai, O vau te Mesia, e e rave rahi hoi te vare. 6 E e faaroo outou i te parau tama’i, e te aueue roo tama’i, e ara râ eiaha outou e mātā‘u; ia tupu hoi taua mau mea ra e tia’i; aita râ e fatata te hopea i reira. 7 E tia mai hoi te tahi fenua e aro mai i te tahi fenua, e te tahi basileia e aro mai i te tahi basileia; e o’e hoi, e te ma’i, e e aueue fenua i tera vahi, i tera vahi.” Mataio 24: 4-7.

Ua tupu a’enei te tahi no te mau mea i faahitihia e te Mesia, e e tupu roa hoi te mau parau atoa ta’na i faahiti mai. Te na ô maira te tahi atu â irava parau e:

“E e parau-haere-hia te evanelia o te basileia nei e ati noa” e teie nei ao, ia ite te mau fenua atoa: o te hopea ihora ia i reira ra.” Mataio 24: 14.

Aore te irava ta tatou i taio na i tupu i te tau a te mau aposetolo, aore roa hoi te hopea o teie nei ao, i parauhia, i tupu i te reira tau, e i teie nei â. Taua irava ta te Mesia i

parau ra no te tau a muri atu ia'na, oia ia te mau mahana hopea nei. Ia poro-haere-hia te evanelia a te basileia e tia'i, ei a ite e, o te hopea ihora ia te reira.

Ua riro Ioane pīpī here ei ite mau i ta te Mesia i parau ra. I uruhia'i o Ioane i te Varua Maitai, ua ite oia i te hoê orama rahi, ei faaiteraa i te mau mea e tupu a muri atu, e ua papaihia te tahi mau mea ma te papu maitai. Te na ô maira te tahi pue irava e:

“Hi'o atura vau i te hoê melahi i te maueraa na ropu i te reva nei: ma te evanelia e tia i te vairaa ra ei pororaa'tu i te feia e parahi i te ao nei ra, i te mau fenua atoa, e te mau opu atoa, e te mau re'o atoa, e te mau nunaa atoa, i te piihua-raa te re'o e, A mātā'u i te Atua, e faahanahana'tu ia'na: ua tae hoi i te hora faautuaraa na'na ra: e haamori outou ia'na, i tei hamani i te ra'i, e te fenua, e te tai, e te mau pape pihaa ra.” Apokalupo 14: 6, 7.

E taio tatou i ta te peropheta, ta Malaki i faaite mai.

“Inaha, e tono vau i tau vea, e na'na e haamaitai i te e'a i mua ia'u ra: e te Fatu ta outou e imi na, o te tae vave mai ia i to'na ra hiero, te vea a te faufaa ta outou i oaoa na: inaha, o te tae mai ia, te parau maira Iehova Sabaota ra. 2 E tia râ ia vai ra ia faaoromai ia tae i te mahana e haere mai ai oia ra? e o vai te mau ia fa mai oia ra? e au hoi oia i te auahi a te tamâ moni ra, e mai te pua a te tamâ ahu ra: 3 e parahi mai oia mai te tamâ e te haamaitai i te ario ra: e na'na e tamâ i te tamarii a Levi, e haamaitai hoi ia ratou mai te auro e te ario ra, e na ratou e hopoi mai i te tusia parau-tia ia Iehova ra. 4 E riro te tusia a Iuda e ta Ierusalem i te mea mauruuru na Iehova i reira, mai tei te anotau tahito ra, te mau matahiti i mutaa ihora.” Malaki 3: 1-4.

Ia tae mai teie vea ta te peropheta, ta Malaki, i faaite, hou te Mesia e tae mai, e tia'i.—FARANI FULUMARE.

(E tuatihia mai teie parau.)

Te Parau Tuatapapa no
Iosepha Semita.

(TUATIRAA.)

PENE XVI.

MATAHITI 1833.

Ua haamatahia te peapea i te Feia Mo'a i Missouri. Ua pure te mau Peresibutero. Ua haapararî te enemî i te fare neneiraa vea, e ua hamani ino ratou i te mau taeae.

I TE ono no Eperera, i te matahiti 1833, ua haaputuputu te Feia Mo'a no Missouri i te pae pape i parauhia ra, te Anavai Rahi Belu, ei mana'oraa i te mahana faatiaraa o te Ekalesia, e ua oaoa ana'e ihora ratou i taua mahana ra.

Muri iti a'e i taua amuiraa ra o te Ekalesia, ua haaputuputu te enemî, e toru hanere, i te oire ra o Inidipenideni, ia feruri ratou i te ravea e tia'i ia ratou ia tiahi ê i te Feia Mo'a. A haaputuputuhia'i, ua inu ratou i te ava, e ua faataerohia, ei reira ua tupu te peapea i rotopu ia ratou ratou iho, tama'i ihora, e ua purara ê atura. Ua ite te Feia Mo'a i te amuiraa o te feia hamani ino, e i reira ua amui-atoa-hia ratou, e ua pure i te Fatu ia paruru Oia ia ratou, ia ore te Ekalesia ia hamani-ino-hia, e oia mau atura. Aore te enemî i haapeapea noa'i i te Feia Mo'a e tae noa'tu i te avae Tiurai, e i reira, no te ohipa itoitoe, e te haavare rahi o te hoê orometua no te hoê haapaoraa ê, ua haamata faahou ratou i te opua hamani ino i te Feia Mo'a. E i te 20 no Tiurai, ua amuihia'i te hoê amuiraa no te enemî, e pae hanere taata, e tei roto i taua amuiraa ra te tahi mau taata toroa no te hau, e ua imi ratou i te ravea, ia ore e tupu te Ekalesia i taua fenua ra. E teie tei feruribia e ratou, oia hoi, eiaha roa ia tae faahou te Feia Mo'a i te mataeinaa ra ia Iaketoni, e ia hoochia'tu to ratou fenua e tia'i, e ia haere ê atura, e eiaha ia nenei faahou i te vea "Fetia Ahiahi e te Poipoi."

Ua maiti te apooraa enemi i te hoê tomite, hoê ahuru ma piti taata, e ua tonohia ratou i te Feia Mo'a ia faaite atu ia ratou tei titauhia e te enemi, e ia ore ratou ia haapao i taua titauraa ra, e tiahi-ê-hia'i ratou e tia'i. E ua titau te enemi ia pahonohia'i e te Feia Mo'a tei titauhia e ratou i roto i na hora e piti e tia'i. Ua farerei to ratou tomite ia Eduata Paterita e ia Viliamu W. Phelepe e i te tahi atu â mau taeae, e ua faaite atu ia ratou i te faaueraa o te enemi. Ua parau te mau taeae ia ratou, eiaha e rû, e faataime rii â, e tia'i ia ratou ia faaite atu i te reira i te mau taeae, ei reira e pahono atu ai ratou i taua titauraa ra. Aore roa te tomite no te enemi i farii i tei parauhia mai e te mau taeae, ho'i ana'e atura ratou i te apooraa. A faaroo a'era te enemi i te reira, ua tupu to ratou riri i te rahiraa, e mai reira ua haere atura ratou i te fare o Viliamu W. Phelepe, i te vahi neneiraa vea, e ua tiahi ê atu ratou i to'na utuafare i rapae i nia i te purumu. Te pohe noa ra ta'na tamarii i te ma'i, aita roa ratou i aroha noa'tu ia'na, e ua haapararî roa ratou i to'na fare, e ua eiâ ratou i te auri neneiraa vea, e te mau leta auri neneiraa, e te mau pepa, e te tahi atu â mau mea i reira. Mai reira ua haere atu te enemi i te fare o te episekopo ra o Eduata Paterita, e ua rave ratou ia'na, aratai atura i te fare haavâraa, e ua parai ratou ia'na i te tâ, e ua tapirihia oia e ratou i te huruhuru moa, no te mea aita roa e tia ia'na ia huna i te faaroo, e ia faarue i to'na ihora fenua o tei hoo-mau-hia e a'na. E ua hamani ino atoa ratou i te hoê taeae, o Tehare Alana to'na i'oa, mai ia Eduata Paterita i te huru.

I na mahana e toru i muri mai, i te 23 no Tiurai, ua apoo faahou te enemi, e ua afai mai ratou i to ratou mauhaa tama'i, e ua huti i te tahi reva uteute, ei tapao toto, ei haamăta'uraa'tu i te Feia Mo'a.

Ua ite papu roa te Ekalesia e, ia ore ratou ia faatia e ia faarue hoi i to ratou fenua e ia haere ê atura, e tahe noa to

ratou toto, e no reira ua faaau ratou i te tahi parau i te enemi, e tia'i i te hoê afa no ratou ia faarue i te fenua na mua i te hoê no Tenuare, 1834, e te afa toe no te feia e reva atoa hou te hoê no Eperera, 1834. E ia ite te tomite no te enemi i te reira, ua parau maira ratou e ore ratou e hamani ino faahou i te Ekalesia. Muri mai i taua peapea rahi ra, ua tonono te Ekalesia ia Olive Taudere i te oire Ketelani, ia faaite atu ia Iosepha e i te Ekalesia i te parau apî, e i to ratou ra hamani-ino-raa-hia e te enemi, e ua maiti atoa te Ekalesia, e ua tonono atu ratou i te hoê tomite, e ua faaite atu ratou i te tavana rahi no te fenua, o Daniel Dunklin to'na i'oa, i to ratou peapea rahi. A faaroo ai oia i te reira, ua tupu to'na aroha, e ua parau maira oia ia ratou, teie te ohipa o te haavâ rahi o te fenua ra, te hi'opoa e te faaite mai i te ravea e tia'i ia faaore, e ia faatitiaifaro i te peapea, teie râ, ua reva ê na oia, area râ ia ho'i mai oia, ei reira e papai mai ai te tavana ia ratou i te pahonoraa tei titauhia e te tomite. Hoê avae i muri a'e, ua papai mai te tavana i te hoê leta i te Ekalesia, e ua faaite mai oia, e mea tia ore roa to ratou hamani-ino-raa-hia, e ua parau mai oia, e mea tia ia haavâ te ture fenua nei i te feia o tei hamani ino ia ratou. E ua parau mai oia, te tia noa ra te mau taata toroa no te hau i ô ratou, e e mea tia ia aratai mai ratou i tei hamani ino i te Ekalesia, ia haavâhia, e ia faautuahia e tia'i. E e parau mau roa ta'na, teie râ, aita roa'tu te feia mana toroa i haapao, noa'tu tei parauhia e te tavana rahi.

A mau noa ra te tavana i to'na toroa, ua aroha noa oia i te Ekalesia i to ratou peapea rahi, aita râ i faaho'i mai i to ratou ra mau fare, e te fenua e te mau mea tei haruhia e te enemi. E tavana aroha, paruparu râ, e te puai ore i te faatiaraa'tu i tei au i te Feia Mo'a i to raton ra peapea rahi, e ua tia i oia i te tau ia ore noa te peapea mai i tei tauturu-orehia e a'na.—VILIAMU SETEMILA.

(E tuatihia mai teie parau.)

Te Muru o te Tatarahapa.*Te Huru e te Rahi o te Hara:**Te Huru e te Rahi o te Hara:*

TE mau taata o tei ofati i te ture a te Atua, ua hara ia (Ioane Hoê 3: 4.), no te ture ua tae mai te ravea ia rave i te hara. O tei ore i ite i te ture, aita e tia ia rave i te hara. No te tuuraahia mai i te ture, e tupu mau ia te parau-tia e tia'i, i te haapaoraa i te ture ra, e o tei ore i haapao i te ture, ua hara ia. Mai te mea aita e ture, aita e parau-tia, aita atoa e hara. Roma 4: 15. E e rahi ai te ture, e rahi ai te hara, no te mea e rahi roa te mau mea i rahuihia, e te mau mea hoi ia haapaohia e te taata e tia'i. E e tupu mai ai te parau-tia i te rahiraa i te haapaoraa i te ture rahi e tia'i. E faaau tatou i teie i te ture evanelia nei, ia faaroo te taata i te Atua, e te evanelia o te Mesia ra, ua haapiihia e ua farii mai oia i te ture teitei a'e i te mau ture ta'na i ite na mua. E te mau mea tia ore i ravehia e a'na i mua a'e nei, e mea papu roa ia ia'na i teie nei, e mau hara ia. No to'na ite i te ture, ua maramarama oia i te mau mea tia ore ta'na i rave ra, ei faahaparaa i te ture, e hara ia, e no reira ua papu roa ia'na i te rahi o ta'na mau hara, e te ino hoi o taua mau hara ta'na i rave ra. E tena na, o tei faahapa i te ture, o te hara ia, area râ, e faito te rahi o te hara ta'na i rave, i te maramarama o te ture ta'na i ite.

*Tapao Hoê no te Tatarahapa:**Te Katoa e te Huru e te Rahi o te Hara:*

No te ite e te auraroraa i te ture, e te fa'iraa i te faahaparaa i te reira, ua riro ia te tapao matamua no te tatarahapa. Te ture apî tia roa, oia hoi te Evanelia, e te mea tia mau no taua ture ra, oia hoi o Iesu Mesia, ei faaiteraa papu roa ia i te mau mea tia ore ta te taata i rave nei. E i reira, ua ite ratou i te huru mau o to ratou hara, o tei ore i itehia e ratou na mua. E ia haamana'o atu ratou i ta ratou ihora mau hara, e i te Mesia hoi, o tei ore roa i rave i te hara, ei reira ua taa ia ratou i te rahi o te mau hara ta ratou i rave

ra. E ia fa'i ta ratou mau hara, o te haamataraa matamua ia te reira no te tatarahapa. Ua ite te mau taata e rave rahi i ta ratou ihora mau hara, aita râ e tia ia faaite atu ia vetahi ê ra, e ua haavare ratou ia ratou iho, e ua faahapahia ratou e te parau a Ioane, o tei na ôraa e, "Ia parau tatou e aita a tatou e hara, te haavare nei tatou ia tatou iho. Ia parau tatou e aore a tatou e hara i rave, ua faariro tatou ia'na (Iesu Mesia) ei haavare, e aore ta'na parau i roto ia tatou nei." Ioane Hoê 1: 8, 10. No te mea aita roa e taata i te fenua nei, o tei ore roa i rave i te hara. Koleleta 7: 20. I te tahi mau taima i te anotau tahito ê ra, ua a'ohia te mau taata rave hara, na roto i te parau haamăta'u mai te faaitehia'tu ia ratou e, ia ore ratou ia tatarahapa e roohia'i ratou e te ino. Ioane pene 3; e Te Mau Arii Hoê 17: 18. E te vai atura te parau. Ia ore te taata ia faaaraarahia i te huru o ta ratou mau hara, e ore roa e tia ia ratou ia tatarahapa mau. Mai te mea ia riro te taata, "ei ture na'na iho", e ia ore oia e fa'i i ta'na mau hara, ua faaerehia ia'na iho i te mana ia tatarahapa.—VILIAMU SETEMILA.

(E tuatihia mai teie parau.)

Te Rima o te Atua.

"E ua hi'o atura vau, ite atura i te hoê taata i rotopu i te Etene i faataa-ê-hia i te huaai o to'u na tuaana i te moana rahi ra; e hi'o atura vau i te Varua o te Atua i te pouraa mai i raro e te faaururaa ia'na; e ua haere atura oia na nia i te moana rahi ra e tae atura i te huaai o to'u na tuaana, tei te fenua i parauhia ra." Buka a Moromona; I Nephi 13: 12.

I TE oire o Genoa, i Italia, i te matahiti 1447, ua fanau maira te hoê taata, o Christopher Columbus to'na i'oa. I to'na apîraa ra, haere atura oia i te haapiiraa, e ua itoitroa oia i te haapii i te otoraphia. Ia paari iti a'era, haere atura oia i te fenua Paniola, i te hoê haapiiraa teitei atu, ei

reira ua itoito faahou oia i te haapii i te otoraphia.

I taua anotau ihora, ua mana'ohia e te mau taata e, e mea parahurahu te ao, e i na reira atoa i te haapii atu. Aita râ te mau feia feruri hohonu i farii mai i taua haapii-raa ra, no te mea na roto i ta ratou mau ravea paari, ua roaa mai ia ratou te mana'o e, e mea menemene te ao, mai te poro te huru.

E teie nei, e taata paari roa o Columbus, e ua amui-atoa-hia mai oia i taua pūpū taata paari ra. E raatira pahi oia, e ua tere pinepine atura oia i te hoê motu nainai, o Iceland te i'oa.

I te matahiti 1485, ua haere atura oia i te hau Portugal, ui atura oia i te arii tane e te arii vahine, ia tauturu mai raua ia'na i te hoê ravea no'na, oia hoi, i te imiraa i tefenua apî, aita râ oia i manuïa. Aita râ to'na mana'o i paruparu, haere tia'tura oia i te na oire o Genoa, e o Venice, e i na hau o Beritani, e o Paniola, manuïa a'era oia i to'na titauraa i reira.

Hou i to'na ra titauraa i te moni, ei tauturu ia'na i ta'na ravea, ua faaroo a'era oia i te hoê re'o, na roto mai i te moemoea, i te na ôraa e, "E faariro au i to oe na roo ia haaati roa i to te ao atoa nei, e e horoa'tu ai au i te mau taviri o te moana, tei tapea i te mau fifi puai, ia oe na." Mai reira mai â, ua ite papu roa oia e, ua maitihia oia, mai roto mai i te mau taata atoa, ia faatupu i te hinaaro o te Atua, e e tuati i te na hopea o te ao, e e haaputuputu i te mau nunaa atoa, e te mau opu atoa, e te mau re'o, i raro a'e i te reva o te Faaora. -

I te 17 no Eperera, 1492, ua arataihia o Columbus i mua i te aro o te arii tane e te arii vahine no Paniola, e ua faatoroahia oia e raua, ei raatira no te hau. E i taua mahana ihora, ua haamata oia i te faaineine no to'na tere, e ua faatomohia te mau pahi e toru ra. Teie te mau i'oa o taua mau pahi ra, e to ratou mau raatira, oia hoi, o "Sanata Maria", e o Columbus ia te raatira; o "Pinata", e o Alonizo Pinizoni

ia te raatira; o "Nina", e o Vineceta Pinizoni ia te raatira. Ua ineine ratou, e ua fano atura i te 3 no Atete, 1492. Ua tere noa ratou e na mahana e rave rahi. Moe atura te fenua ia ratou ra, tupu a'era te mana'o paruparu i roto i te aaui o te mau mataro. I te 9 no Atopa, mârô atura ratou ia Columbus. Ua faatupu ratou i te hoê opua ino, teie ia, ia po, e haru ratou ia'na, e e huri ia'na i raro i te moana, ei maa na te mao. Aita râ taua opuaraa ra i tupu.

Ua faahau o Columbus ia ratou i te hoê parau faaaui, oia hoi, ia tae i te toru o te mahana e aita te fenua i iteahia e ratou, ei reira ia, e ho'i atu ai ratou i te vahi no reira mai. Ua mairihia te piti o taua na mahana ra, e aita te fenua i iteahia. Ua peapea i hora te mana'o o Columbus, e po i hora, e ua mairi te hora hoê ahuru e ma piti, ori haere noa oia i nia i te tahua pahi, aita roa oia i taoto. Hi'o noa'tura oia i roto i te poiri, peneia'e e ite atu oia i te hoê tapao no te fenua. Aita râ i iteahia. Roroa iti a'era, ho'i faahou atura oia, ite atura oia i te hoê mea i te amaraa, papu a'era oia e auahi mau ia, pii hua'tura, i te na ôraa e, Auê! e fenua, e fenua! Ua haruru i hora te hoê pupuhi, ei faaite i na pahi e, ua itea te fenua, e hora hoê ia i te poipoi. E ao a'era, ite atura ratou i te hoê fenua nehenehe roa, e te mau anavai, e te mau peho, e te mau uru raau hoi. Oaoa rahi to ratou. Ua tae i te hopea o to ratou tere, e ua roa ia ratou te mea ta ratou i imi.

A hi'o na tatou i te mana rahi o to tatou Atua. Ua faatupu Oia i te hinaaro i roto i te aaui o taua taata nei, o Columbus, ia imi oia i te hoê fenua apî, e ua na reira'toa oia. E ua faaora te Atua ia'na i te mau mea ri'ari'a rahi no te moana nei. Ua aratai atoa'tu te Atua ia'na i te hoê fenua apî, oia hoi, Amerika ra. No reira, e homa e, tia mau atura te mea ta Nephi i ite i to'na ra orama.

—MORONI POUTERA.

(E tuatihia mai teie parau.)

Te Mau Parau Api.

I TE avae ra Novema, ua pohe a'enei to tatou tuahine, o Tafira, i te fenua ra, i Takaroa, e ua hunahia oia i reira.

I te oire ra o Boston, i Amerika, tei reira te hoê taata, o Beniamina to'na i'oa, e hitu avae to'na roa, e e 360 paunu to'na teiaha.

I te avae ra Ditema, ua pohe a'enei to tatou tuahine, o Teheura a Tuanaga, i te mataeinaa ra o Faaa. E ua hunahia oia i Ziona, na Farani i faatere te pureraa, mai te tauturuhia e Tira raua o Rua. Na te mau taeae e te mau tuahine o te faaroo Tanito i himene.

I te fenua Utaha, i Amerika, ua faaapuhia e te tahi mau taata i te hoê pota monamona. E ia paari a'era, hopoi atura ratou i ta ratou auhune i te fare taviriraa, e ua farii mai ratou i te moni ta tane. Teie te rahi hoi o te moni ta ratou i farii, oia hoi, \$1,200,000.

Tei Califonia te hoê taata faatau roa, aore roa oia e rave i te ohipa. E te poia noa ra ta'na vahine e ta'na mau tamarii, e aore roa'tu oia e imi i te ravea ia faaamu ia ratou. Ua hopoihia'tu oia i mua i te hoê haavâ, e ua faautuahia e piti matahiti i roto i te fare auri e te tupai haere i te ofai i nia i te mau purumu.

I na matahiti i mairi a'enei, ua imi papu te hoê taote Amerika i te hoê ravea ia faaore te hiaai ava no te taata nei. Inaha, teie nei, ua iteahia taua ravea ra. Teie ia, ia tupu te hiaai i te ava i roto i te aa taata nei, ei reira, ia inu oia i te ū puaaniho, na te reira e faaore ai i taua hiaai i te ava ra. Auê te paari e te ite rahi hoi e!

I te avae ra Novema, ua haere atura te hoê pae o te pūpū himene no te fare pureraa menemene i Roto Miti, i te mataitai haere i te mau oire rarahi i Amerika. Ei te mau vahi ta ratou i tipae ra, ua himene ia ratou. Ua tae ratou i te aivi ra o Kumora, ei reira ua himenehia te hoê re'o himene, "Ua Pou Maira Moroni", e ua himene-atoa-hia, "Te Pure Matamua a Iosepha Semita." Ua tipae atoa ratou i Ketelani, e ua hineme ratou i reira, e ua tae ratou i te oire, i te fenua tiaraa hiero, i Inidipenideni, e ua tairuru ratou atoa, i reira ratou i te himeneraa i te himene ra, "Auê, te Peropheta e!". I to ratou parahiraa i reira, ua haere mai o Iosepha Semita, Peresideni no te Ekalesia i faaapîhia, e ua farerei ia ratou, e ua tae ratou i te vahi i fanau ai te Peropheta ra o Iosepha (metua), e ua tae ratou i te fare o te Peresideni o te hau Amerika. E ua himene ratou i reira, e ua farii maitai mai oia ia ratou. E ua manuîa maitai roa to ratou tere; e 6,000 maile te roa i te vahi ta ratou i haere; e 22 oire rarahi ta ratou i tipae, e 250 taata tei haere i taua tere ra.

Ua hoohia'tu te hoê moa ufa uouo i Amerika e te hoê taata e teie te rahi o te moni, oia hoi, e \$1,200, moni Amerika.

I te 30 no Ditema, ua reva'tu o Tira raua o Terani i te Tuamotu. E haere raua i te fenua ra, i Hao, ei tauturu i te faatiaraa fare pureraa apî. Na nia raua i te pahi no Mapuhi i te revaraa'tura.

Tei Baranidina, Califonia, te hoê mauteni i faaapuhia, e no to'na tupu maitai, maere ana'e ihora te taata, e teie te rahi o to'na teiaha, ia faitohia 150 paunu, e hitu avae to'na menemene.

I te 23 no Novema, ua tupu te hoê ati ri'ari'a rahi i te fenua ra, o Farani. Ua faaterehia te hoê pereoo auahi, e te mau pereoo ta'na i ta-vere. E tae atura i te hoê e'a turu, mairi atura te e'a turu e te pereoo auahi, e te mau pereoo i taverehia e a'na i raro roa, no te puai o te ua, e te pape tahe, i mairi ai taua e'aturu, e ua pohe roa e 60 taata, e ua ora mai te tahi pae.

Ia ora na te taata atoa i raro a'e i te tamârû o te hau Farani, i Oceania, i roto i te Matahiti Apî, 1912. Ua haapao ihora matou i teie nei Matahiti Apî i Papeete nei, i te 31 no Ditema. I na mahana rii i mua'e, ua tahoê ihora to te Ekalesia i to ratou mana'o, e ua aufaahia e ratou te moni rii, tai piti toata i te taata hoê, ei hoo i te mau maa e au no taua amuraa maa ra. E fatata a'era taua mahana ra, roohia ihora o Made, e o Tiuria i te ma'i. E faaorehia'tura taua amuraa maa ra, faaho'ihia'tura te moni a te mau taeae e te mau tuahine. E tae atura i te ahiahi i taua mahana ra, ua putuputu maira te Ekalesia i te fare parahiraa. E tae a'era i te hora ahuru e ma hoê e te afa, ua haapaohia te pureraa o te Matahiti Apî, e tae atura i te hora ahuru e ma piti, faaotihia'tura taua pureraa. Tia paatoa a'era te mau taeae e te mau tuahine i nia, tuu ana'e ihora i te tapao aroha i te tahi e te tahi, no te Matahiti Apî, haere ana'e atura i te utuafare ma te oaoa e te mauruuru rahi. E poipoi a'era, i te 1 no Tenuare, i te hora hitu i te ahiahi, ua putuputu faahou maira te Ekalesia, e ua haamatahia te himene, e te pure, e te mau arearea maitatai, e oti a'era, amu ana'e ihora te mau taeae e te mau tuahine i te pape toetoe, e te faraoa monamona, e paia roa a'era, faaoti ihora matou i teie nei tairururaa na roto i te himene e te pure, haere ana'e ihora matou i te utuafare mai te maitai.

Toae a Maire, Faaau Parau,

Rue Dumont d'Urville, Orovini, Papeete, Tahiti.

Frank J. Fullmer, Imprimeur,

Rue Bréa et de la rue Dumont d'Urville, Papeete, Tahiti.